

摘藻堂四庫全書薈要

集部

欽定四庫全書薈要卷一萬八千三百十一

集部

御選宋詩卷四

樂府歌行一

徐鉉

柳枝辭十二首

把酒憑君唱柳枝也從絲管遽相隨  
逢春只合朝朝醉  
記取秋風葉落時

南園日暮起春風吹散楊花雪滿空  
不惜楊花飛也得

愁君老盡臉邊紅

陌上朱門柳映花  
簾鉤半捲綠陰斜  
憑郎暫駐青驄馬  
此是錢塘小小家

夾岸朱顏柳映樓  
綠波平慢帶花流  
歌聲不出長條密  
忽地風回見綵舟

老大逢春總恨春  
綠楊陰裏最愁人  
舊遊一別無因見  
嫩葉如眉處處新

濛濛堤岸柳含煙  
疑是陽和二月天  
醉裏不知時節改

漫隨兒女打鞦韆

水閣春來乍減寒  
曉妝初罷倚闌干  
長條亂拂春波動  
不許佳人照影看

柳岸煙昏醉裏歸  
不知深處有芳菲  
重來已見花飄盡  
惟有黃鶯轉樹飛

此去仙源不是遙  
垂楊深處有朱橋  
共君同過朱橋去  
密映垂楊聽洞簫

暫別揚州十度春  
不知光景屬何人  
一帆歸客千條柳

腸斷東風楊子津

仙樂春來按舞腰  
清聲偏似傍嬌嬈  
應緣鸞舌多情賴  
長向雙成說翠條

鳳笙臨檻不能吹  
舞袖當筵亦自疑  
唯有美人多意緒  
解衣芳態畫雙眉

柳枝詞十首

座中應制

金馬詞臣賦小詩  
梨園弟子唱新詞  
君恩還似東風意  
先入靈和蜀柳枝

百草千花共待春  
綠楊顏色最驚人  
天邊雨露年年在  
上苑芳華歲歲新

長愛龍池二月時  
穆穆金線弄春姿  
假饒葉落空枝後  
更有梨園笛裏吹

綠水成文柳帶搖  
東風初到不鳴條  
龍舟欲過偏留戀  
萬縷輕絲拂御橋

百尺長條浣麴塵  
詩題不盡畫難真  
憑君折向人間種  
還似君恩處處春

風煖雲開晚照明翠條深映鳳凰城人間欲識靈和態  
聽取新詩玉管聲

醉折垂楊唱柳枝金城三月走金羈年年為愛新條好  
不學蒼華也是絲

新春花柳競芳姿偏愛垂楊拂地枝天子徧教詞客賦  
宮中要唱洞簫詞

凝碧池頭蘸翠連鳳凰樓畔簇晴煙新詩欲詠知難詠  
說與雙成入管絃

侍從甘泉與未央  
移舟偏要近垂楊  
櫻桃未綻梅花老  
折得柔條百尺長

田錫

江南曲三首

金蟬飾綠雲  
細靨蘂黃新  
南浦解清珮  
西谿采白蘋  
密竹映深花  
湖山日欲曛  
春腸知己斷  
脉脉兩難親  
吳艷若芙蓉  
乘舟弄湖水  
照影不知休  
雲鬟墮簪珥  
含笑忽迴頭  
見人羞欲死  
歸去入花谿  
棹濺鴛鴦起



金陵王氣銷六朝墮霸業白雲千古恨空江照樓堞虎  
丘羅蔓草姑蘇委楓葉懷賢思伍員靈濤浩難涉

晚雲曲

高唐晚峯欲生雨空山啼猿風嘯虎卷雲數片留南浦  
自與鴛鴦共飛舞

倚柱吟

暮春慘慘黃昏雨零落櫻桃斜掩戶未張燈火簾幕深  
樓閣巢寒聞燕語昔時常說長安好而今厭走長安道

蘇秦辨說長卿才自笑功名何不早人悄悄倚柱時情  
脉脉無人知憐春惜遠情不盡斜雨兼花閣濕衣

紫雲曲

沉沉鸞殿垂珠箔祥煙瑞氣含樓閣三十六宮明月中  
夜靜無風花自落寶屏珠帳一夢時靈仙初降趨丹墀  
煙衣霞綬赤瑛珮鈞天樂部前參差合奏鏗鏘向金屋  
云是仙鄉紫雲曲朱弦遠召舜湘靈鳳管應呼秦弄玉  
天漢星流夜既闌露零珠樹彤庭寒芙蓉枕上夢初覺

猶聞庭際聲珊珊上曉五音十二律仙曲記時心歷歷  
金線龍頭紅玉笛新聲吹得雲飄逸應是夔襄樂府魂  
翻得雅音聞至尊俾與霓裳羽衣曲遞相奏向梨花園

春洲謠

衣鮫綃兮美人采白蘋兮水濱裊羽翅兮為飾步羅襪  
兮生塵絲絲兮遠道萋萋兮芳草遠山眉兮淡掃

短歌行

曉月蒼蒼向煙滅朝陽皎皎明丹闕杜鵑催促躑躅開

鷓鴣已鳴芳草歇芳春苦不為君留古人勸君秉燭遊  
願與喬松弄雲月紫泥仙海鸞凰洲

冠準

古別意

水螢光淡曉色寒庭除索寞星河殘清樽酒盡艷歌闕  
離人欲去肝腸絕露荷香散西風驚征車漸遠聞雞鳴  
深閨從此泣秋扇夢魂長在遼陽城

江南春二首

波渺渺柳依依孤邨芳草遠斜日杏花飛江南春盡離  
腸斷蘋滿汀洲人未歸

杳杳煙波隔千里白蘋香散東風起日落汀洲一望時  
愁情不斷如春水

張詠

柳枝詞

青連遠戍和煙重靜映疎櫳窄縷輕遊子不歸春夢斷  
南邨一樹看啼鶯

遠映天街近遶池長條無力自相依上陽宮女愁方絕  
又見東風有絮飛

王禹偁

拍板謠

麻姑親採扶桑木鏤脫排焦其數六雙成捧立王母前  
曾按瑤池白雲曲幾時流落來人間梨園部中齊管絃  
口中纔動我能應知音審樂功何全吳宮女兒手如筍  
執向玳筵為樂準數聲慢仙人夜齒下雲棧老狐臘月

渡黃河緩步輕輕踏冰片數聲急空江電打漁翁笠  
鮫人泣對水晶盤滿抱珠璣連瀉入劃然一聲送曲徹由  
基射透七重札金壘冷落閒無聞隴頭凍把泉聲絕律  
呂與我數自齊絲竹望我為宗師總驅節奏在術內歌  
舞之人無我欺所以唐相牛僧孺為文命之為樂句

畬田詞

有序

上雒郡南六百里屬邑有豐陽上津皆深山窮谷  
不通轍跡其民刀耕火種大底先斫山田雖懸崖

絕嶺樹木盡仆俟其乾且燥乃行火焉火尚熾即以種播之然後釀黍稷烹雞豚先約曰某家某日有事于畬田雖數百里如期而至鋤斧隨焉至則行酒啗炙鼓譟而作蓋劓而掩其土也掩畢則生不復耘矣援桴者有勉勵督課之語若歌曲然且其俗更互力田人人自勉僕愛其有義作畬田詞五首以侑其氣亦欲採詩官聞之傳之於執政者曰苟擇良二千石暨賢百里使化天下之民如斯



民之義庶乎汙萊盡闢矣其詞俚欲山人之易曉也

大家齊力斲孱顏耳聽田歌手莫閒各願種成千百索

山田不知畝畝但以百尺繩量之曰某家今年種得好若干索豆萁禾穗滿青山

殺盡雞豚喚劬畲田來遞互作生涯莫言火種無多利

樹種明年似亂麻

種穀之明年自然生禾山民獲濟

穀聲獵獵酒醺醺斫上高山入亂雲自種自收還自足

不知堯舜是吾君

北山種了種南山相助力耕豈有偏願得人間皆似我也應四海少荒田

畚田鼓笛樂熙熙空有歌聲未有詞從此商於為故事  
滿山皆唱舍人詩

韓琦

柳枝詞五闋

樓前輕雪未全銷偷得春光入嫩條似向東風猶綽約  
可能渾忘舞時腰

陌間宮古綠煙迷惹盡春愁困拂堤却為多情足離恨  
故教溝水亦東西

章街風曉起新眠寒食輕陰未雨天無限青絲拂遊騎  
一生芳意負金鞭

輕煙輕日簇誰家微出青旗一帶斜對景似嫌春意老  
更搖疎影拂殘花

畫橋南北水連天纔聽鶯聲又晚蟬長使離魂容易斷  
春風秋月自依然

再賦柳枝詞二闋

曲江風暖曉陰斜，翠色相宜拂鈿車。  
自是春眠猶未起，日高人困又飛花。

葉葉新長約黛蛾，絲絲輕軟任風梭。  
啼鶯便學歌喉轉，知是春來舞意多。

范仲淹

明月謠

明月在天西，初如玉鈎微。  
一夕增一分，堂堂有餘輝。不

掩五星耀不礙浮雲飛徘徊河漢間秀色若可餐清風  
起叢桂白露生階蘭高樓望君時為君拂金徽奏以堯  
舜音此音天與稀明月或可聞顧我亦依依月有萬古  
光人有萬古心此心良可歌憑月為知音

清風謠

清風何處來先此高高臺蘭叢國香起桂枝天籟迴飄  
飄度清溪浮雲安在哉萬古鬱結心一旦為君開有客  
慰所思臨風久徘徊神若遊華胥身疑立天台極渴飲

沆瀣大暑執瓊瓌曠如攜松丘騰上煙霞游熙如即莊  
老語入逍遙道朱絃鼓其熏可以解吾民滄浪比其清  
可以濯吾纓願此陽春時勿使飄暴生千靈無結慍萬  
卉不摧榮庶幾宋玉賦聊廣楚王情

文彥博

郊祀歌二首

降神

在國南方時維就陽以祈帝祉式致民康豆籩鼎俎金

石絲簧禮行樂奏皇祚無疆

飲福

潔茲五齊酌彼六尊致誠斯至率禮彌敦以介景福永  
隆後昆重熙累洽帝道攸尊

朝會樂章八首

皇帝升坐隆安

天臨有赫上法乾元鏗鏘六樂儼恪千官皇儀允肅玉  
坐居尊文明在御禮備誠存

公卿入門正安

堯天協紀舜日揚光淑慎爾止率由舊章佩環濟濟金石鏘鏘威儀炳煥至德昭彰

上壽禧安

乾健為君坤柔曰臣惟其臣子克奉君親永御皇極以綏兆民稱觴獻壽山嶽嶙峋

白龜

聖德昭宣神龜出焉載白其色或游于川名符在洛瑞



應巢蓮登歌丹陛紀異靈篇

甘露

天德冥應仁澤載濡其甘如醴其凝若珠雲表潛結顥  
英允敷降于竹柏永昭瑞圖

紫芝

煌煌茂英不根而生蒲茸奪色銅池著名晨敷表異三  
秀分榮書于瑞典光我文明

嘉禾

嘉彼合穎致貢升平異標南畝瑞應西成德至于地皇  
祇效靈和同之象煥發祥經

白兔

盛德好生網開三面明眎標奇昌辰乃見育質雪園淪  
精月殿著于樂章色含江練

親耕籍田樂歌七首

出大次

勤勞稼穡必躬必親為籍千畝以教導民帝出乎震時

維上春天顏咫尺望之如雲

親耕

元辰既擇禮備樂成洪縻在手祇飭專精三推一撥端  
冕朱紘靡辭染屨以示黎甿

升壇

方壇屹立陞級而登玉色下照臨觀耦耕萬目咸覩如  
日之升成規成矩百祿是膺

公卿耕籍

羣公顯相奉事齊莊率時農夫舉耜載揚播厥百穀  
以佑我皇多黍多稌丕應農祥

羣官耕籍

畧畧良耜我田既臧土膏其動春日載陽執事有恪于  
此中邦農夫之慶棲畝餘糧

降壇

肇新帝籍率我農人三推終畝祇事咸均陟降孔時粲  
然有文受天之祐多稼如雲

歸大次

教民稼穡不令而行進退有度琚瑀鏘鳴言還煩幄禮  
則告成帝命率育明德惟馨

祭文宣王廟樂歌四首

迎神

大哉至聖文教之宗紀綱王化丕變民風常祀有秩備  
物有容神之格思是仰是崇

初獻

右文興化憲古師今明祀有典吉日惟丁豐犧在俎雅  
奏來庭周旋陟降福祉是膺

奠幣

一王垂法千古作程有儀可仰無德而名齊以滌志幣  
以達誠禮容合度黍稷非馨

酌獻

自天生聖垂範百王恪恭明祀陟降上庠酌彼醇旨薦  
此令芳三獻成禮率由舊章

折楊柳

長憶都門外，低垂拂路塵。  
更思南陌上，攀折贈行人。  
人經歲別楊柳，逐年新。  
何當逢塞鴈，重寄一枝春。

關山月

蕩子久行役，遼西戍未還。  
佳人怨遙夜，清淚浥朱顏。  
薛晦蘭閨寂，塵昏寶鏡閒。  
相思不相見，明月下關山。

采蓮曲

江南秋色早，江上早蓮芳。  
佳人采紅萼，兩槳渡橫塘。  
翳

日華芝薄隨風綿絳長蕩舟方自樂綠水任霑裳

夜夜曲

明月流清漢娟娟照洞房微風吹敗葉颯颯下銀牀塵  
晦流黃素鑪銷辟惡香年年機杼妾獨怨夜何長

長相思

遠別苦無悰離居常戚戚顧慕懷所歡徘徊彌自惜瓊  
藥不可采瑤華未堪摘惟憑尺錦書一寄長相憶

陌上桑



佳人名莫愁采桑南陌頭因來淇水畔應過上宮遊貯  
葉青絲籠攀條紫桂鈎使君徒見問五馬亦遲留

俠少行

錦帶佩吳鈎翩翩躍紫騮垂鞭度永埒挾彈過長楸平  
樂十千酒南城百尺樓荆娥拂雙袖日夕又遲留

陽春曲

頗傷金管遽仍恨緹光促四序若循環百年如轉軸佳  
人暮不歸蘭苔春又綠空持綠綺琴愁弄陽春曲

巫山高

巫山高不極高與碧穹齊朝雲常藹藹暮雨復淒淒  
髣髴聞珠佩依稀認繡鞋無能留彼美徒使夢魂迷

尹洙

皇雅十首

天監受命也自梁至於周兵難不息宋受命統一  
萬方焉

天監下民亂靡有定甚武且仁祚厥真聖仁實懷徠武

以執競匪虔匪劉拯我大命自昔外禪月經日營令以  
挾制政以陰傾帝初治兵志勤于征奄受神器匪謀而  
成淮潞弗虔卒汙叛逆戎輅戒嚴皇威有赫彼寇誅民  
吾勇其百殄厥渠魁貸其反側帝朝法宮左右宗公忭  
夫悍士以雍以容爾居爾室爾工爾農既息既養惟天  
子功

西師征蜀也

王用西師岷梁弗賓匪曰負固實交晉人予訓予誓合

我將臣正厥有罪無庸傷民矯矯虎士載摧其壁于嗟  
孟侯亦果其策迎師而降靡抗鋒鏑鎬宣獨身謀完是宗  
國蜀都既平將臣失律此衆悍驕彼民危慄當塗叫呶  
合萬為一匪懷則威帝心是恤帝曰將臣予嘉乃庸廢  
命毒民爾弗有終邦典用疑惟罪惟功靡極而削協于  
厥中帝曰孟侯受封于楚旂旂琱戈備物異數俾爾族  
姻及乃文武服在王庭靡不有序蜀民呼歌天子威靈  
保我者封暴我者刑匪勁是和匪弱是陵天子惠民疇

敢不承

耆武受俘也命將伐南海平金陵俘二王以獻

耆武定功時惟二方淮服其義海南遂荒孰孱而盤孰  
暴而猖自底不諛乃終滅亡帝戒二俘同即爾誅予惟  
民無辜休息是圖時其輯矣寧威獨夫帝嗟汙邦久罹  
于兵或暴下以征或敷虐以刑予命中典協于國經民  
服德音室家以寧

憲古今守臣也削其附庸以強帝室焉

帝懷永圖治古是憲四方守臣惟屏惟翰在昔艱難弗  
惠訓典跨都連城高牙以建有土有民肆乃征繕以息  
以容終焉叛渙凡今帥臣徂厥聞見匪革亂源曷清多  
難帝告庶邦式是典彝元侯顯父戚臣宗支正乃封圻  
予一人是毗凡曰附城罔爾俾之畜兵厚賦靡爾得私  
毋凶而國作福作威天子有命疇敢不祗子孫承承唯  
萬世規

大鹵王師討晉罪也

冀州之疆粵惟大鹵俗忤而專地扼而固協比幽都蕩  
搖邊圉三垂既摧允威弗沮帝御六師百萬貔虎剪其  
附庸至于城下鋒鏑始交梯衝如舞蠢爾孱王請附降  
土我士奮揚願究吾武皇帝曰吁念彼黎庶匪鯨匪鯢  
復為王土晉郊既平九區以寧陳功太廟告假威靈在  
昔武王于商觀兵惟我藝祖亦勤于征匪貸晉罪俟厥  
貫盈聖作聖繼巍巍相承皇矣二后功莫與京

帝籍修故典也躬耕以勸農焉

帝籍于郊典儀具陳務農以訓供祀以勤祀在于誠匪  
勤于人訓農以實匪訓以文帝謹二物乃躬乃親公侯  
卿士暨厥庶民千甸有服飭哉惟寅帝賚高年式宴且  
喜種種黃髮族丘而議我生艱難暴亂以繼耳鉦金鼓  
目狎戎器皇其我圖親講農事有子有孫力田孝弟鼓  
舞至仁薰焉如醉

庶工任賢也

帝咨庶工疇其輔予俊乂以登厥勞乃圖匪忘舊勲非



賢勿俞魏魏哀台盛德以居任賢伊何昌言是庸勉告  
爾猷罔恤廼躬宜無直辭悌于予衷予不爾疵爾無面  
從始時從官戎容揚揚今帝左右儒冠煌煌朝廷以尊  
文物典章得人之盛奕世重光

帝制北方請盟也

帝制萬邦罔有弗賓蠢爾化外羈馬勿臣威格三方稽  
顙獻珍匪茹革心願交使人帝謀公卿列侯庶校咸曰  
彼心暴戾陰狡既擾我疆復利吾寶無若勵兵襲其還

道皇曰有衆予實念茲戰無必勝矧其歸師借曰大獲  
疇能盡之益俾餘醜毒吾朔陸乃俞其盟北州以綏在  
漢世宗抗威速攻暴農算商經用弗充中區震騷漢室  
始空降及後世猶稱厥功於穆皇考德無與偕匪勤于  
兵荒服遂來逮是三紀遠俗以懷生民休息嗚呼仁哉  
皇治恤刑也帝仁于明刑在位者以寬恤為治焉  
皇底其治欽哉惟刑在疑而宥罔察為明愛怒弗肆孰  
為重輕毋一弗辜惟典之平前世理官倚法以刻匪彼

為仇蓋曰任職今之蔽獄務正其辟鑒于前人繫我仁  
德皇德在仁寢而成風公侯卿士靡不率從麇卯萌生  
咸保厥終不鄙不夭樂哉融融

太平封祀告成功也

噫太平無象兮世烏得而知維盛德可迹兮其封祀之  
儀東岱宗兮西汾睢禮上帝兮賓地祇皇有征兮吾民  
以嬉皇有祈兮吾民是私天數佑兮俾皇之釐億世永  
寧兮無疆之基

張方平

宋頌

祈汾陰祀后土也

萬邦清和歲乃薦有思皇烈祖既勤繹止撫有疆土迄  
若正命安綏有家於嘻承武敦尚繹思亦既顯報以升  
以降以禋以祀報時介育介育不已生物靡靡降福侈  
侈其達驛驛其豐疑疑

天監有事于南郊也

昊天蓋高降監顯在於亶熙哉詔佑我有宋三后介之  
天命可畏翼翼保之對越在上維懷格思乃眷不違福  
祖繁錫宜我子孫永以無斁

有浚者泉大裕祖宗也

有浚者泉匪長自源皇建民極彌萬世則允時帝軒之  
力肆有羨德小侯國是宅大龜是食帝命不越炎德原  
發丕顯后祖懿德之平聖猷庭庭帝命是膺彤盧旌斧  
以征以輔洵烈且武肇荒東宇克寬克擾不澄不撓百

休是保天祿始造江介既獲湖潭嶺陬右敘川蜀并汾  
之酋師行優優不犯不劉取其大球旂裳冠旒格其僭  
戾悉公我謀三象霧霽無競無紉中葉奕章有猷有常  
敷哲維人天錫無疆彌億萬年山嶽之固河流之長嗚  
呼令王寔念茲來享

載耜修千畝也

月旅孟陬農事既飭陽氣蒸達原隰充澤駕言徂郊載  
耜告籍申命農畯率時主伯爰任疆游開其茨棘乃播

而實亟耘以擇既發我公亦服爾私迄登稔成有獲丕  
丕爰稟于廟積億及秭以豐粢盛以供酒醴以禮賓尸  
以格祖禰既登既徹亦勞其耄以蜡以醑穡夫胥悅

朝元引

星斗挂空碧鸞鶴翔紫清朝真弟子古壇上爐煙裊裊  
金磬聲露脚斜白寒不動千山岑寂橫煙清絳闕太真  
冠簡靜紫宮夫人璫珮鳴霞旌曉邁遺空谷石磴雲埋  
瑤草綠殘蟾冷帖西南隅迴首塵寰煙一簇

老將行

聖明天子仁且英  
海寰內外歸神靈  
辭客相誇鳳皇詔  
功臣不貌麒麟形  
繡旗塵卷霞紋闇  
古劍秋澀銅花青  
尚餘舊受征西馬  
侍從日仗登云亭

桃源二客行

劉郎阮郎丹籙客  
桃花源中有舊宅  
閒尋流水過碧溪  
忽聞雞犬見人跡  
瓊臺瑤榭知何所  
紫雲深處開朱戶  
鶴駕龍輶綵仗來  
鸞歌鳳舞霞觴舉  
世緣未斷塵心狂



苦厭仙家日月長  
洞門一閉恍如夢  
歸路古木何荒涼

石介

宋頌

皇祖太祖皇帝初用師伐潞州殺李筠伐揚州滅

李重進也

皇祖神武疇敢違  
拒元年四月筠畔于潞  
皇祖躍馬至潞城下  
筠窘赴火焦頭爛髻

皇祖龍驤誰敢猖  
狂元年九月進叛于揚  
皇祖徐驅至

揚城隅進窘登樓并焚其孥

皇祖曰嘻物情難籌予代有周天時人謀罔有不同予德其休

予亦即祚涵濡養撫罔有失所予德其裕

筠胡予違進胡不隨予匪汝誅汝自取之

既剪二盜聖武輝耀荆潭蜀吳如拔腐草

聖神太祖皇帝出師援長沙且假道徑進取荆潭也

不疾而速不怒而威惟聖惟神其幾其微

二國之君各保爾土虎憑于山莫予敢取蛟馮于淵莫予敢侮萬斯年兮闕鑄以固

聖機神謀天秘地藏風行雷動震于八荒旦秣我馬夕取其疆二君不知晏眠于牀

具篤與舟同朝天子一發五紆二君皆至皇祖聖神鴻光丕懿

湯湯太祖皇帝收蜀取孟昶也

湯湯其江區區爾孟一夫當關不知天命蟻固于穴蛙  
負于井咫尺之地為可以騁

彼以險守我以德懷王師東來函谷自開蜀主授首呼  
號哀哀蜀人鼓舞與我偕來

昔時蜀道絕人來往今蜀既平王道蕩蕩尉侯一置朝  
貢相望巍巍皇祖德聲遠暢

莫醜太祖皇帝用周渭之策命潘美取廣州也

莫醜匪虺莫悍匪兇有銀在南毒螫不已沸湯熱火暴

我赤子

皇祖曰嘻天生蒸民樹之君長以養以仁乃予不恤匪  
銀之器

乃謀于渭乃將于美王師鷹揚涉江萬里闢其城門銀  
號請死

皇祖有德乾覆坤容予在弔民不殺以封皇祖仁慈感  
于昆蟲

金陵太祖皇帝命師取李煜也

金陵我我長江萬里誰為巢穴養此蛇豕天豈作限而險而恃不順不臣敢抗天子

帝赫斯怒王師徐驅蕞爾螻蟻豈勝誅鉏哀哀窮俘爰叫以呼歸于京師燁哉聖謨

聖文錢俶以吳越歸也

聖文安安聖武桓桓朝貢萬里正朔百蠻無吳之險無蜀之艱無潭之噐無荆之頑感于賓順悅色和顏

彼俶在杭有地千里皮毀毛落孤睽莫恃懾服聲教慕

為臣使攜彼人民挈其土地于橐于囊歸于天子  
天子聖神罔不懷柔既懷而封恩涵澤流逆予有刑視  
彼揚州順予有封視此錢侯赫赫宋德何有窮休

慶歷聖德頌

并序

三月二十一日大昕皇帝御紫宸殿朝百官相得  
象殊拜竦樞密使夸簡以司徒歸第二十二日制  
命昌朝參知政事弼樞密副使二十六日勅除修  
靖素並充諫官四月八日皇帝御紫宸殿朝百官

衍樞密使仲淹琦樞密副使乃用御史中丞拱宸  
御史邈御史平諫官修靖十二疏追竦樞密使勅  
十三日勅又除襄為諫官天地神人昆蟲草木無  
不歡喜皇帝退奸進賢發於至聰動於至誠奮於  
睿斷見於剛克陟黜之明賞罰之公也上視漢魏  
隋唐五代凡千五百年其間非無聖神之主盛明  
之時未有如此選人之精得人之多進人之速用  
人之盡實為希闊殊尤曠絕盛事在皇帝之德之



功為卓犖瑰偉神明魁大古者一雲氣之祥一草木之異一蹄角之怪一羽毛之瑞當時羣臣猶且濃墨大字金頭鈿軸以稱述頌美時君功德以為無前之休丕天之績如仲淹弼寔為不世出之賢求之於古堯則夔龍舜則稷契周則閔散漢則蕭曹唐則房魏陛下有之諸臣亦皆今天下之人望為宰相諫官者陛下盡用之此比雲氣草木蹄角毛羽之異萬萬不侔豈可翻無歌詩雅頌以播吾

君之休聲烈光神功聖德刻於琬琰流於金石告  
於天地奏於宗廟存於萬千年而無窮盡哉臣實  
羞之臣嘗愛慕唐大儒韓愈為博士日作元和聖  
德頌千二百言使憲宗功德赫奕煒炳昭於千古  
至今觀之如在當日陛下今日功德無讓憲宗臣  
文學雖不逮韓愈而亦官於太學領博士職歌詩  
讚頌乃其職業竊擬於愈輒作慶歷聖德頌一首  
四言凡九百六十字文辭俚鄙固不足以發揚臣

子之心亦欲使陛下功德赫奕煒炳照於千古萬  
千年後觀之如在今日也臣不勝死罪臣賤無路  
以進姑藏諸家以待樂府之采焉

於維慶歷三年三月皇帝龍興徐出闡闔晨坐太極盡  
開閭闔躬攬英賢手勸奸桀大聲颯颯震搖六合如乾  
之動如雷之發昆蟲躑躅妖怪藏滅同明道初天地嘉  
吉初聞皇帝蹙然言曰予父予祖付予大業予恐失墜  
實賴輔弼汝得象殊慎重微密君相予久予嘉君伐君

仍相予筮鑪斯協昌朝儒者學問該洽與予論政傳以  
經術汝貳二相庶績咸秩惟汝仲淹汝誠予察太后乘  
勢湯沸火熱汝時小臣危言業業為予司諫正予門閭  
為予京兆聖予讒說賊叛于夏往予式遏六月酷日大  
冬積雪汝暑汝寒同于士卒予聞辛酸汝不告乏予晚  
得弼予心弼悅弼每見予無有私謁以道輔予弼言深  
切予不堯舜弼自笞罰諫官一年奏疏滿篋侍從周歲  
忠力盡竭契丹亡義檮杌饕餮敢侮大國其詞慢悖弼

將予命不畏不懾卒復舊好民得食褐沙磧萬里死生  
一節視弼之膚霜剝風裂觀弼之心鍊金鍛鐵寵名大  
官以酬勞渴弼辭不受其志莫奪惟仲淹弼一夔一契  
天實賚予予其敢忽並來弼予民無瘥札曰衍汝來汝  
予黃髮事予二紀毛禿齒豁心如一分率履弗越遂長  
樞府兵政毋蹶予早識琦琦有奇骨其器魁樞宜視店  
棊其人渾朴不施剗可屬大事敦厚如勃琦汝副衍  
知人予哲惟修惟靖立朝讞讞言論礪礪忠誠特達祿

微身賤其志不怯嘗詆大臣亟遭貶斥萬里歸來剛氣  
不折屢進直言以補予闕素相之後含忠履潔昔為御  
史幾叩予榻至今諫疏在予箱匣襄雖小臣名聞予徹  
亦嘗獻言箴予之失剛守粹慤與修儔匹並為諫官正  
色在列予過汝言毋鉗汝舌皇帝明聖忠邪辨別舉擢  
俊良埽除妖魃衆賢之進如茅斯拔大奸之去如距斯  
脫上倚輔弼司予調燮下賴諫諍維予紀法左右正人  
無有邪孽予望太平日不逾浹皇帝嗣位二十二年神

武不殺其默如淵聖人不測其動以天賞罰在予不失其權恭己南面退奸進賢知賢不易非明不得去邪惟艱惟斷乃克明則不貳斷則不惑既明且斷惟皇之德羣下踧踖重足屏息交相告語曰惟正直毋作側僻皇帝汝殛諸侯危慄墮玉失鳥交相告語皇帝神明四時朝覲謹修臣職四夸走馬墜鎧遺策交相告語皇帝神武解兵修貢永為屬國皇帝一舉羣臣懾焉諸侯畏焉四夸服焉臣願陛下壽萬千年

歐陽脩

馬齧雪

馬飢齧雪渴飲冰北風卷地來崢嶸馬悲躑躅人不行  
日暮塗遠千山橫我謂行人止歎聲馬當勉力無悲鳴  
白溝南望如掌平十里五里長短亭臘雪消盡春風輕  
火燒原頭青草生遠客還家紅袖迎樂哉人馬歸有程  
男兒雖有四方志無事何須勤遠征

風吹沙



北風吹沙千里黃馬行  
确犖悲摧藏當冬萬物慘顏色  
冰雪射日生光芒一年百日風塵道  
安得朱顏常美好攬鞍鞭馬行  
勿遲酒熟花開二月時

歸田四時樂春夏二首

秋冬二首  
命聖俞分作

春風二月三月時農夫在田居者稀  
新陽晴暖動膏脉野水汎濫生光輝  
鳴鳩聒聒屋中啄播穀翩翩桑下飛  
碧山遠映丹杏發青草暖眠黃犢肥  
田家此樂知者誰我獨知之何不歸  
吾已買田清潁上更欲臨流作釣磯

南風原頭吹百草草木叢深茅舍小麥穗初齊雉子嬌  
桑葉正肥蠶食飽老翁但喜歲年熟餉婦應知時節好  
野棠梨密啼晚鶯海石榴紅轉山鳥田家此樂知者誰  
我獨知之歸不早乞身當及彊健時顧我蹉跎已衰老

春寒曲效長吉體

東風吹雲海天黑飢龍凍雲雨不滴嗔雷隱隱愁煙白  
宿霧無光瑤草寂東皇染花滿春國天為花迷借春色  
呼雲鑠日恐紅蕙幾日春陰養花魄悠悠遠絮縈空擲

愁思織春挽不得高樓去天無咫尺遠岫參差亂屏碧

梅堯臣

武陵行

生事在漁樵所居亦煙水野艇一竿絲朝朝狎清泚忽  
自傍藤陰乘流轉山背始覺景氣佳潛通小溪裏常時  
不見春入谷驚紅藥幽興窮綠波翫芳心莫已花外一  
峯明林間碧洞啓遙聞雞犬音漸悟人煙邇捨舟遂潛  
行石徑劣容屐豁然有田園竹果相叢倚龐眉髻髻人

倏遇心顏喜尚作秦衣裳那知漢名氏自言逢世亂避  
地因居此來時手種桃今日開如綺更看水上花幾度  
逐風委競引飯彫胡邀飲酌瓊醴復呼童稚前綠鬢仍  
皓齒翻遣念還茅思歸釣鱸鯉將辭亦贈言勿道丘壑  
美鼓枻出仙源繁英猶邈迤薄暮返滄洲微風吹白芷  
他日欲重過茫茫何處是

一日曲

妾家鄧侯國肯愧邯鄲姝世本富繒綺嬌愛比明珠十

五學組紉未嘗開戶樞十六失所適姓名傾里閭十七

善歌舞使君邀宴娛自茲著樂府不得同羅敷涼溫忽

荏苒屢接朝大夫相歡不及情何異逢路衢昨日一見

郎目色曾不渝結愛從此篤暫隔猶恐疎如何遂從宦

去涉千里途郎跨青驄馬妾乘白雪駒送郎郎未遠別

妾妾仍孤不如水中鱗雙雙依綠蒲不如雲間鵲兩兩

下平湖魚鳥尚有託妾今誰與俱去去約春華終朝怨

日賒一心思杏子便擬見梅花梅花幾時吐頻掐欄干

數東風若見郎重為歌金縷

挾彈篇

長安細侯尚年少獨出春郊不須曉手持柘彈霸陵邊  
豈惜金丸射飛鳥金丸射盡飛鳥空解衣市酒向新豐  
醉倒銀瓶方肯去去卧紅樓歌吹中不管花開與花老  
明朝還去杜陵東

鳥啄棗

樹頭陽鳥飢啄棗破紅滿地青蠅老青蠅雨濕驚不飛

殘棗入泥人不埽西風落盡烏亦歸晉客齒黃終懊惱

御選宋詩卷四

謹案卷四第八頁後七行穀聲獵獵酒醺醺刊本  
穀訛鼓據王禹偁小畜集改


第三十頁後一行不畏不懾按石介徂徠集作不  
畏而懾與此異

第三十二頁後一行北風吹沙千里黃刊本沙訛  
草據本題及歐陽文忠集改





陸氏之印



總校官庶吉士臣侍朝

校對官檢討臣蕭九成

謄錄舉人臣李駟

欽定四庫全書薈要

集部

御選宋詩卷

五

六



詳校官原任主事<sub>臣</sub>李斯咏

欽定四庫全書薈要卷一萬八千三百十二

集部

御選宋詩卷五

樂府歌行二

龔宗元

搥砧詞

星存耿耿寒煙浮白龍銜月臨霜樓誰家砧弄細腰杵  
一聲搥破江城秋雙桐老翠墮金井高低冷逐西風緊  
靜如秋籟暗穿雲天半驚鴻斷斜影哀音散落愁人耳

何處離情先喚起長信宮中葉滿堦洞庭湖上波平水  
萬里征夫眠未成搖風搥月何丁丁楚關秦嶺有歸客  
一枕夜長無限情

劉敞

魏京

上二十年始建北京以章明先帝巡狩之德以孝  
思逮下於時野之處士或相與議曰蓋文王都豐  
武王都鎬豐鎬之間不能數百里文武之位不過

侯伯而詩人乃以聖人之德天子之事歌之有如  
聖朝德位相伴述作相繼而無適駿烝哉之詩此  
乃處士之罪非公卿之過也乃考聲謨辭以繼大  
雅垂之無窮其文曰

皇作大都大都雄雄奄定北固四方來同皇曰卿士在  
昔聖考祇適文武維慈幼老天監在上既有明德乃命  
于下罔有不復匪允命之亦章慶之匪允服之亦保育  
之時維獫狁侮予之疆靡度靡虞跳呼以狂業業烝黎

載震載驚侵魏及澶羣心不寧帝奮厥武百萬其士匪  
怒以棘于三十里如虎如貔如霆如雷靡有遠邇天子  
其來天子來止士增其喜孰偷其生以不奮興驅之渾  
渾攘之賁賁靡有輟張殲厥鯨鯢或獻其寶或請其命  
帝振于旅維時既定屹屹魏土山河之固匪山河則固  
維上帝伊怒既閔爾弓既橐爾矛獫狁臣之四方是休  
皇曰卿士聖孝之德允于孝思孝思維則爾眎于魏以  
作我都以赫厥靈俾後勿踰皇曰卿士維帝時功時亦

維人維冠萊公爾敬爾止弼予于治期爾前人用迪爾  
事皇曰卿士維帝作武垂是萬年莫敢予侮泰山之封  
后土之禪予監若茲維天是眷翼翼魏土天子國之穆  
穆原廟聖人則之孰為彊暴來覲來覲俾讐于威于忠  
是訓顯顯天子孝德自躬率是休烈覃之北戎河水東  
注昭哉禹績時萬斯年天子之德

楊白花

飛飛楊白花隨風渡江水江水來不極楊花去無已鴉



啼淺深樹雪落千萬里春氣傷人心  
絲絲復如此

劉攽

上書行

仕不至二千石賈不至五百萬此事夸者憂而非志士  
歎君不見下邳少年受書起幄中運籌制千里功成不  
受三萬戶拂衣歸從赤松子君不見計倪半策誅強吳  
鷗夷扁舟浮五湖三致千金不自擅至今籍籍宗陶朱  
大賢富貴不為己心事邈與常人殊逢時致身如反掌

雲蒸龍變無時無君勿愛上書獻賦稱賢豪刺繡倚市  
相矜高丈夫昔曾笑徒勞商賈旦旦爭錐刀

司馬光

華星篇

涼風淨埽雲無迹海月未生星歷歷貝聯珠貫拱北辰  
三五縱橫此何夕重樓疊榭出秋空鳩鵲露寒連桂宮  
瑤井迴臨丹闕外玉繩斜挂瑣窗中征人遠別空閨悄  
鐘漏蕭疎天不曉碧沙展轉無復眠卧視寒光度華沼

漢家賢將戍臨洮結髮從軍今二毛誰憐身老心猶壯  
深入長占太白高豐城古劍沈淪久匣中夜半雙龍吼  
乃知神物不自藏紫氣依稀見牛斗有客離居望所親  
遙知清夜會荀陳隄絲未息無由去不及浮槎河畔人  
時視役河上寄  
郡中諸同舍

楊白花

勸君勿嫌楊花太輕薄籬下溝中紛漠漠翠鬟婢子不  
勝愁埽盡還飛滿朱閣晚來風雨送行春天無遊絲地

無塵雪狂絮亂安可得孤樹青青愁殺人

海山歌

東望海波蒼茫浩渺無所極高浪紅濤黯風色翻星倒  
漢天地黑陰靈出沒互相索東方曠曠景氣清慶雲合  
沓吐赤精蓬萊瀛洲杳如萍遙觀五樓十二城羣仙劍  
佩朝玉京祥風飄渺鈞天聞彩幢翠蓋煙霞生鸞歌鳳  
舞入帝鄉紫麟徐驅白鶴翔餐芝茹朮飲玉漿千年萬  
年樂未央

天馬歌

大宛汗血古共知青海龍種骨更奇  
網絲舊畫昔嘗見不意人間今見之  
銀鞍玉鐙黃金轡廣路長鳴增意氣  
富平公子韓王孫求買傾家不知貴  
芙蓉高閣北向開金印紫綬從天來  
路人回首無所見流風瞥過驚浮埃  
如何棄置歸卓犖跼足垂頭困羈絆  
精神慘淡筋骨羸舉目雙睛猶璀璨  
伏波馬式今已無子阿肉腐骨久枯  
舉世無人相騏驥憔悴不與鴛鴦殊  
神兵淬礪精芒在

寶劍遊塵肯終晦君今鬢別被鳴鸞尚能騰踏崑崙外  
洛陽少年行

銅駝陌上桃花紅洛陽無處無春風青絲結尾連錢驄  
相從射獵北邙東流鞭縱鎬未云畢青山團團載紅日  
雲分電散無影迹黃雞未鳴已復出

烏衣曲二首

風透金鋪結綺錢穿簾入幌舞垂蓮可憐無人夜不曉  
起視西窗月華皎

星疎月明漏水長羅幃翠帳華燈光佳人起舞玉釵墮  
門外烏棲鴈南過

馮山

俠少行

山東自古多才雄輟耕隴上羞為農鄉兵名在萬選中  
一日聲價聞天聰十石弩力三石弓殿前野戰如飄風  
白錦戰袍腰勒紅詔容走馬出閭闔都人仰看如飛鴻  
歸來意氣人誰及道逢刺史獨長揖邯鄲白日袖劍行

振武青樓乘醉入傳聞留後收蘭州姓名御筆親點抽  
府金百鎰輕一擲且向塞外隨遨遊自此鋤犁變任俠  
夜事推理晝馳獵有田無人耕有子不養家田間父老  
長咨嗟

沈括

江南曲

新秋拂水無行跡夜夜隨潮過江北西風卷雨上半天  
渡口微涼含晚碧城頭鼓響日脚垂天際籠煙鎖山色



高樓索莫臨長陌黃竹一聲無北客時平田苦少人耕  
惟有蘆花滿江白

沈遼

簫鼓曲

樂不在歡合悲不在生離感此簫鼓曲已堪華髮衰月  
明大隄路雨暗浙江西狼籍一杯酒淒涼千里期誰言  
天涯恨逸韻起相思清角竟不返悵然心不怡

龜茲舞

龜茲舞龜茲舞始自漢時入樂府世上誰傳此樂名不  
知此樂猶傳否黃扉朱邱晝無事美人親尋教坊譜衣  
冠盡得畫圖看樂器多因西域取紅綠結茵坐後部長  
笛短簫形製古雞婁提鼓舊所識鐃貝流蘇分白羽玉  
顏二女高髻花孔雀羅衫金畫縷紅靴玉帶踏筵出初  
驚翔鸞下懸圃中有一人鼓羯鼓頭如山兮手如雨其  
間曲調雜晉楚歌詞至今傳晉語須臾曲罷立前廡歎  
息平生未嘗覩清都閬苑昔有夢寂寞如今在何所我

家家住江海涯上國樂事殊未知玉顏邀我索題詩他  
時有夢與誰期

踏盤曲二首

湘水東西踏盤去青煙白霧將軍樹社中飲酒不要錢  
樂神打起長腰鼓女兒帶環著縵布歡笑捉郎神作主  
明年二月近社時載酒牽牛看父母

胡盧笙不著簧細腰鼓三尺長吹笙擊鼓山之旁數跳  
宛轉樂盤王盤王一去三千年古曲舊調至今傳山祥

水氣不斷處壞木燒作兜婁煙

白蘋花

白蘋花生水中綠葉牽紫莖浩蕩向西風西風日夜冷  
落日河洲靜

王令

江上詞

渡江遇  
風作

江之水分東流汭湍流兮望歸舟舟來歸兮何時步芳  
洲兮濯足陟南山兮采薇江風波兮日暮望夫人兮未

來

噫田操四章章六句

田彼黍矣則食于秋我人之耕載芟載耨耨豈不憚勞  
將食無教

田彼黍矣幾不螽蟳我人之耕而不謀年唯其不謀年  
是用卒食于田

伐木伐木無廢于勤不足柱櫬猶用以薪豈弟君子無  
易于人

誰能采芹不適有獲果蓏樹之則食其實豈弟君子孔  
敬且力

張載

短簫歌

靈旗指不庭方大風泱泱天外揚短簫歌歌愷康朝廷  
萬年繼明重光曾孫稼如茨梁嘉與萬邦純嘏有常

文同

大垂手

華堂合樂轟春晝鳳叫龍嘶畫鼉吼瓊貌壓地開組繡  
美人舞兮獻君壽紅婆娑兮翠蚶蜆雪翻花兮風入柳  
曳輕裙兮揚綵綬金鸞飛兮玉麟走入急破大垂手香  
檀札札江雨驟情凝力定方舉袖煙收霧斂曲徹後錦  
盈車兮珠滿斗

採蓮曲

綠纈襠紅繡裳衫盤蜂蝶裙鴛鴦雕瑰錯寶垂鬢長紫  
冒翠蓋行新妝踣躑曲堤下回塘畫橈送入波中央羅

袖卷起金釧光搖輕撼脆敲短芒丹瓊紺玉低復昂霑  
裊輕粉撲嫩黃蠶腰蛛腹絲飄揚列坐綵舫求比方笑  
聲吃吃動明璫挨蒲拂蓼次岸旁風吹落霞供晚涼西  
城鷓鴣啼女牆歸來索酒酌滿觴吳屏蜀帳圍象牀困  
卧不起燈燭張琉璃盞在叢生香

吳趨曲

萬頃平湖水晴光射早霞紅裙鬪畫楫相結採荷花  
岸上相將疊鼓催青翰齊上碧波開鷓鴣屬玉不驚起



慣見蘭橈日日來

蕩漾水中舟徘徊岸邊馬相看兩不語密意待誰寫

貴侯行

將軍功勲滿旂常昨日賜對開明光腰懸橐駝紫金鈕  
爵號進拜諸侯王戟衣翩翩弄春影大第高門臨萬井  
但願囊書絕邊警常官中都奉朝請

貞女吟

身外無一簪何以供鉛華飭行不飭容濁水白藕花藕

心亂如絲妾心圓如珠絲亂端緒多珠圓瑕類無焉得  
偶君子奉之此高節所生雖至親此意安可說

織婦怨

擲梭兩手倦踏繭雙足趺三日不住織一疋纔可剪織  
處畏風日剪時謹刀尺皆言邊幅好自愛經緯密昨朝  
持入庫何事監官怒大字雕印文濃和油墨汚父母抱  
歸舍拋向中門下相看各無語淚迸若傾瀉實錢解衣  
服買絲添上軸不敢輒下機連宵停火燭當須了租賦

豈暇恤襦袴前知寒切骨甘心肩胛露里胥踞門限叫  
罵嗔納晚安得織婦心變作監官眼

折楊柳

垂楊百尺臨池水風定煙濃盤不起欲折長條寄遠人  
想到君邊已憔悴

拾羽曲

新羅研紅裙襖齊綵縷刺衫花倒提新晴暖日麗煙草  
金獸鬣鎖藏春閨朱橋逼江曉沙白錦帶交風大堤窄

蘭洲遺翎得淺碧歸來驚飛上嬌額

巫山高

巫山高高凝煙十二碧簪寒插天危巖絕壁已飛動况  
復下壓萬丈之蒼淵波衝浪激作深井虎眼徹底時一  
漩長風瀕湧發濫瀕惡色怒勢因誰然我欲截中流虹  
梁莫得施螭蜃東西相望遠不到兩目欲斷心將穿回  
看高唐廟下灑靈雨遣我歸意常翩翩

芳樹

庭前有芳樹穠陰滿軒碧莫惜更攜酒醉此青春色朝  
來見鷓鴣飛鳴繞其側光景不可留徒遣君歎息

起夜來

曉窗明綠紗蜀錦壓春卧橫腮虎魄冷驚起新夢破玲  
瓏轉條脫縹緲梳倭墮高軸響銀牀時誤君車過

蘇軾

續麗人行

并引

李仲謀家有周昉畫背面欠伸內人極精戲作此

詩

深宮無人春日長沈香亭北百花香美人睡起薄梳洗  
燕舞鶯啼空斷腸畫工欲畫無窮意背立東風初破睡  
若教回首却嫣然陽城下蔡俱風靡杜陵飢客眼長寒  
蹇驢破帽隨金鞍隔花臨水時一見只許腰肢背後看  
心醉歸來茅屋底方信人間有西子君不見孟光舉案  
與眉齊何曾背面傷春啼

四時詞

春雲陰陰雪欲落東風和冷驚羅幕漸看遠水綠生漪  
未放小桃紅入夢佳人瘦盡雪膚肌眉斂春愁知為誰  
深院無人剪刀響應將白紵作春衣

垂柳陰陰日初永蔗漿酪粉金盤冷簾額低垂紫燕忙  
蜜脾已滿黃蜂靜高樓睡起翠眉顰枕破斜紅未肯勻  
玉枕半揎雲碧袖樓前知有斷腸人

新愁舊恨眉生綠粉汗餘香在蘄竹象牀素手熨寒衣  
爍爍風燈動華屋夜香燒罷掩重扃香霧空濛月滿庭

抱琴轉軸無人見  
門外空聞裂帛聲

霜葉蕭蕭鳴屋角  
黃昏斗覺羅衾薄  
夜風搖動鎮帷屏  
酒醒夢回聞雪落  
起來呵手畫雙鵝  
醉臉輕勻襯眼霞  
真態生香誰畫得  
玉奴纖手嗅梅花

襄陽樂府三篇

野鷹來

野鷹來萬山下  
荒山無食鷹苦飢  
飛來為爾繫綵絲  
北原有兔老且白  
年年養子秋食菽  
我欲擊之不可得  
年



深兔老鷹力弱野鷹來城中有臺高崔巍臺中公子著  
皮袖東望萬里心悠哉心悠哉鷹何在嗟爾公子歸無  
勞使鷹可呼亦凡曹天陰月黑狐夜嗥

上堵吟

臺上有客吟秋風悲聲蕭散飄入空臺邊遊女來竊聽  
欲學聲同意不同君悲竟何事千里金城兩裨子白馬  
為塞鳳為關山川無人空且閒我悲亦何苦江水冬更  
深鰕魚冷難捕悠悠江上聽歌人不知我意徒悲辛

# 襄陽樂

使君未來襄陽愁提戈入市裏  
羶裘自從羶裘南渡沔  
襄陽無事多春遊  
襄陽春遊樂何許  
峴山之陽漢江浦  
使君朱旆來翻翻  
人道使君似羊杜  
道邊逢人問洛陽  
中原苦戰春田荒  
北人聞道襄陽樂  
目送飛鴻應斷腸

薄命佳人

雙頰凝酥髮抹漆  
眼光入簾珠的皪  
故將白練作仙衣  
不許紅膏汙天質  
吳音嬌軟帶兒癡  
無限閒愁總不知

自古佳人多命薄閉門春盡楊花落

太白辭

并引

岐下頻年大旱禱於太白山輒應故作迎送神辭  
一篇五章

雷闐闐山晝晦風振野神將駕載雲罕從玉虬早既甚  
蹙往救道阻脩兮

旌旗翻疑有無日慘變神在塗飛赤篆訴閭闔走陰符  
行羽檄萬靈集兮

風為幄雲為蓋滿堂爛神既至紛醉飽錫以雨百川溢  
施溝渠歌且舞兮

騎裔裔車班班鼓簫悲神欲還轟振凱隱林谷執妖厲  
歸獻馘千里肅兮

神之來悵何晚山重複路幽遠神之去飄莫追德未報  
民之思永萬祀兮

上清辭

君胡為乎山之幽顧宮殿兮久淹留又曷為一朝去此

而不顧兮悲此空山之人也來不可得而知兮去固不可得而訊也君之來兮天門空從千騎兮駕飛龍隸辰星兮役太歲儼晝降兮雷隆隆朝發軫兮帝庭夕弭節兮山宮懷有妖兮虐下土精為星兮氣為虹愛流血之滂沛兮又嗜瘡瘍與螟蟲嘯盲風而涕淫雨兮時又吐旱火之熾融銜帝命以下討兮建千仞之修鋒乘飛霆而追逸景兮歛耒耨滅而無蹤忽崩播其來會兮走海嶽之神公龍車獸鬼不知其數兮旗纛掩靄而冥濛漸

俯偃以旅進兮鏘劒珮之相礮司殺生之必信兮知上帝之不汝容既約束以反職兮退戰慄而愈恭澤充塞於四海兮獨澹然其無功君之去兮天門開歟閭闔兮朝玉臺羣仙迎兮塞雲漢儼前導兮紛後陪歷玉階兮帝迎勞君良苦兮馬虺頽閔人世兮迫隘陳下土兮帝所哀返瓊宮之嗟我兮役萬靈之喧虺默清靜以無為兮時節狩于丰魁詣通明而獻黜陟兮軼蕩蕩其無回忽表裏之煥霍兮光下燭于九陔時遊目以下覽兮五

嶽為豆四溟為杯俯故宮之千柱兮若毫端之集埃來  
非以為樂兮去非以為悲謂神君之既返兮曾顏咫尺  
之不違陞秘殿以內悖兮魂凜凜而上馳忽寤寐以有  
得兮敢沐浴而獻辭是邪非邪臣不可得而知也

黃泥坂辭

出臨臯而東驚兮並叢祠而北轉走雪堂之坡陀兮歷  
黃泥之長坂大江洶以左繚兮渺雲濤之舒卷草木層  
累而右附兮蔚柯丘之蔥蒨余旦往而夕還兮步徙倚

而盤桓雖信美不可居兮苟娛余於一盼余幼好此奇  
服兮襲前人之詭幻老更變而自哂兮悟驚俗之來患  
釋寶璐而被繒絮兮雜市人而無辨路悠悠其莫往來  
兮守一席而窮年時游步而遠覽兮路窮盡而旋反朝  
嬉黃泥之白雲兮暮宿雪堂之青煙喜魚鳥之莫余驚  
兮幸樵蘇之我嫚初被酒以行歌兮忽放杖而醉偃草  
為茵而塊為枕兮穆華堂之清讌紛墜露之濕衣兮升  
素月之團團感父老之呼覺兮恐牛羊之予踐于是蹶



然而起起而歌曰月明兮星稀迎余往兮餞余歸歲既  
晏兮草木腓歸來歸來兮黃泥不可以久嬉

清溪辭

大江南兮九華西汎秋浦兮亂清溪水渺渺兮山無蹊  
路重複兮居者迷爛青紅兮粲高低松千里兮稻千畦  
山無人兮雲朝挂藹濛濛兮渰淒淒嘯林谷兮號水泥  
走鼉鼉兮下鳬鷺忽孤壘兮隱重堤杳冥茫兮聞犬雞  
鬱萬瓦兮鳥翼齊浮軒楹兮飛栱枅雁南歸兮寒蜩嘶

弄秋水兮挹玻瓈朝市合兮雜耄覲挾簞瓢兮佩鋤犁  
鳥獸散兮相扶攜隱驚雷兮驚長蛻望翠微兮古招提  
躋木杪兮翔雲梯若有人兮悵幽棲石為門兮雲為閨  
塊虛堂兮法喜妻呼猿狙兮子鹿麕我欲往兮奉杖藜  
獨長嘯兮謝阮嵇

醉翁操

并引

琅琊幽谷山水奇麗泉鳴空澗若中音會醉翁喜  
之把酒臨聽輒欣然忘歸既去十餘年而好奇之

士沈遵聞之往遊以琴寫其聲曰醉翁操節奏疎  
蕩而音指華暢知琴者以為絕倫然有其聲而無  
其辭翁雖為作歌而與琴聲不合又依楚詞作醉  
翁引好事者亦倚其詞以製曲雖麤合均度而琴  
聲為詞所繩約非天成也後三十餘年翁既捐館  
舍而遵亦沒久矣有廬山玉澗道人崔閑特妙于  
琴恨此曲之無詞乃譜其聲而請于東坡居士以  
補之云

琅然清園誰彈響空山無言惟翁醉中知其天月明風  
露娟娟人未眠荷蕢過山前曰有心也哉此賢醉翁嘯  
詠聲和流泉醉翁去後空有朝吟夜怨山有時而童顛  
水有時而回川思翁無歲年翁今為飛仙此意在人間  
試聽徽外三兩絃

石鼓歌

冬十二月歲辛丑我初從政見魯叟舊聞石鼓今見之  
文字鬱律蛟蛇走細觀初以指畫肚欲讀嗟如拊在口

韓公好古生已遲我今况又百年後強尋偏傍推點畫  
時得一二遺八九我車既攻馬亦同其魚維鱖貫之柳  
古器縱橫猶識鼎衆星錯落僅名斗模糊半已似癡牴  
詰曲猶能辨跟肘娟娟缺月隱雲霧濯濯嘉禾秀稂莠  
漂流百戰偶然存獨立千載誰與友上追軒頡相唯諾  
下揖冰斯同穀穀憶昔周宣歌鴻雁當時籀史變蝌蚪  
厭亂人方思聖賢中興天為生耆耆東征徐土闕虓虎  
北伐犬戎隨指嗾象胥雜沓貢狼鹿方召聯翩賜圭卣

遂因鼓輦思將帥豈為考擊煩矇眊何人作頌比崧高  
萬古斯文齊岫嶺勲勞至大不矜伐文武未遠猶忠厚  
欲尋年歲無甲乙豈有名字記誰某自從周衰更七國  
竟使秦人有九有埽除詩書誦法律投棄俎豆陳鞭杻  
當年何人佐祖龍上蔡公子牽黃狗登山刻石頌功烈  
後者無繼前無偶皆云皇帝巡四國烹滅強暴救黔首  
六經既已委灰塵此鼓亦當遭擊拊傳聞九鼎淪泗上  
欲使萬夫沉水取暴君縱欲窮人力神物義不汙秦垢

是時石鼓何處避無乃天工令鬼守興亡百變物自閒  
富貴一朝名不朽細思物理坐歎息人生安得如汝壽

陌上花

并序  
錄二首

遊九仙山聞里中兒歌陌上花父老云吳越王妃  
每歲春必歸臨安王以書遺妃曰陌上花開可緩  
緩歸矣吳人用其語為歌含思宛轉聽之淒然而  
其詞鄙野為易之云

陌上花開蝴蝶飛江山猶是昔人非遺民幾度垂垂老

遊女長歌緩緩歸

陌上山花無數開  
路頭爭看翠輶來  
若為留得堂堂去  
且更從教緩緩回

蘇轍

竹枝歌

忠州作

舟行千里不至楚  
忽聞竹枝皆楚語  
楚言啁哳安可分  
江中明月多風露  
扁舟日落駐平沙  
茅屋竹籬三四家  
連春並汲各無語  
齊唱竹枝如有嗟  
可憐楚人足悲訴



歲樂年豐爾何苦釣魚長江江水深耕田種麥畏狼虎  
俚人風俗非中原處子不嫁如等閒雙鬟垂頭髮已白  
負水採薪長苦艱上山採薪多荆棘負水入溪波浪黑  
天寒斫木手如龜水重還家足無力山深瘴暖霜露乾  
夜長無衣猶苦寒平生有似麋與鹿一旦白髮已百年  
江上乘舟何處客列肆喧譁占平磧遠來忽去不記州  
罷市歸船不相識去家千里未能歸忽聽長歌皆慘悽  
空船獨宿無與語月滿長江歸路迷路迷鄉思渺何極

長怨歌聲苦淒急不知歌者樂與悲遠客乍聞皆掩泣  
襄陽樂

誰言襄陽苦歌者樂襄陽太守劉公子千年未可忘劉  
公一去歲時改惟有州南漢水長漢水南流峴山碧種  
稻耕田泥沒尺里人種麥滿高原長使越人耕大澤澤  
中多水原上乾越人為種楚人食火耕水耨古常然漢  
水魚多去滿船長有行人知此樂來買槎頭縮項鰻

孔武仲

馬齧麥

馬齧麥僕飲冰北風軒軒搖丘陵十日吁可驚南山喜  
見朝日升潯陽北岸霜泥薄窮臘獨為千里行五里聊  
一止十里復一息楊柳弄輕黃已作春顏色川原入眼  
雖似快時節去家還可惜齧麥不須飽飲冰勿畏寒起  
鞭移擔復五里帝鄉即在須臾間悠哉役夫勉桓桓征  
途幾何莫永歎亦莫悲歌行路難

車家行

上坂車聲遲下坂車聲快  
遲如鬼語相喧啾快如溪沙  
瀉鳴瀨一車人十捧擁行  
江南江北不計程青天白日  
有時住無人止得車輪聲  
晚來驟雨聲濯濯平曉郊原  
盡溝壑方悟車家進退難  
不如田家四時樂

孔平仲

蝴蝶行

蝴蝶飛渡河來河北花已落  
河南花正開盈盈採花女  
撲打還家去推身飛入粉奩中  
芳草綿綿舊時路

車班班

車班班入函關馬蕭蕭度渭橋關下行人不相識橋邊  
美酒留行客海闊天高雲滿空風吹日暮還南北

賀鑄

行路難

驚飈獵榛莽西山匿頽陽四五陰魄晚繁星亦光芒驅  
車何所投却顧歸路長挾轅兩羸特犯此豺虎場安得  
渥洼駿皎旦遊康莊豈徒寫我憂要使塵不揚

竹雞詞

東南澤國陂塘闊  
早歲少逢晴  
五月田間鼃喜雨  
冥冥竹下雞啼泥  
滑滑而予不耕陂下田  
田臯驅馬揮長鞭  
稻塍微茫絕復連  
如躡鏡面流蛟涎  
植蹄沮洳不敢前  
何暇顧惜青連錢  
竹雞烏汝幸飛翔  
羅罽外安知此塗  
吁可畏雄雌更鳴  
方自慰汝不能言  
臆為對君不見日  
圍赫赫是長安  
大明宮闕開雲端  
雞人唱漏辰三刻  
左右相君朝謁還  
前騶誰敢干後乘  
不可攀飄飄青蓋  
望

已遠綠槐陰下沙堤閒長堤千步沙漫漫風不驚塵雨  
亦乾君能馳驚此其所何事江鄉行路難

漁歌

嚴公桐江上呂父清渭濱出處兩能事寥寥千古  
人擁蓑茫笠吳儂子身偶一竿生寄水侯庖富饌羹  
鱸寸鬣分鱗辱刀几吾將一釣懸十捷笑倚扶桑不  
計年鯢鯨懷餌脫相得坐使東南飫食鮮

江南曲

遊倡蹇杜若別浦鴛鴦落向晚鯉魚風客槁千里泊當  
時桃葉是新聲千載長餘隔水情烏衣巷裏人誰在白  
鷺洲邊草自生

變竹枝詞九首

莫把雕檀櫂江清如可涉但聞歌竹枝不見迎桃葉  
隔岸東西洲清川拍岸流但聞竹枝曲不見青翰舟  
露濕雲羅碧月澄江練白但聞竹枝歌不見騎鯨客  
北渚芙蓉開褰裳擬屬媒但聞竹枝曲不見莫愁來



西戍長回首高城當夏口但聞竹枝歌不見行吟叟  
南浦下魚筒孤蓬信晚風但聞竹枝曲不見滄浪翁  
勝槩今猶昨層樓棲燕雀但聞歌竹枝不見乘黃鶴  
危構壓江東江山形勝雄但聞竹枝曲不見胡公宮  
蒹葭被洲渚鳬鷺方容與但聞歌竹枝不見題鸚鵡

四時田家詞四首

鼓聲迎客醉還家社樹團圞日影斜共喜今年春賽好  
纒頭紅有象生花

野蔓牽花過短牆  
麥秋時節井蠶忙  
迎門父老延行客  
井汲清甘樹蔭涼

雞聲犬吠遠相望  
社酒登槽喚客嘗  
曉日清明陂更闊  
風吹蕎麥蜜花香

晚雪漫漫沒兔罝  
滿杯豆粥餉隣家  
夜長少婦無春織  
一點青燈伴緝麻

楊柳枝詞二首

方過清明雨後天  
回塘照影弄蹁躚  
深情擬屬東風主

愛惜長條待少年

楊柳東風盡日吹柔條應自不禁持都門三月傷心地  
強半青青贈別離

陳襄

樓上曲

金徒抱箭寒更起寂寞孤城一千里姮娥擎出月華來  
白玉樓臺瑩如水上有佳人紅粉妝妙年學得吹霓裳  
呼兒將出紫玉笛一聲天外流宮商宮商欲盡何幽咽

曲調不成聲斷絕羅衣掩淚愁向天手把瑤華歌一闋  
寒蟾出兮明星稀良人阻兮天一涯憑軒遙望兮心傷  
悲願隨鴻鵠兮高飛

郭祥正

廬陵樂府十首

妾擡纖纖手一拂白玉琴琴聲寫三疊寄妾萬里心朱  
絃斷可續妾心常不足纔驚楓葉丹又見楊枝綠望君  
君未到妾貌寧長好雲鬢懶重梳從教似秋草

鴻雁殊未來思君一彈琴泠泠別鶴語折盡幽蘭心蛛絲漫相續難繫驂騑足白日無時停雲鬢寧長綠年華要不老不若丹青好對之雖無言猶勝種萱草

與子初執手效彼瑟與琴子去既不返誰復知我心寶刀能切玉願斷金烏足留住枝上春花紅葉長綠懊惱復懊惱憔悴變妍好不見庭中蘭埋沒隨百草

妾身厭塵埃專心託君子感君一回眄洎轍逢秋水雍容未經年結誓同生死胡為忽言別短書無一紙愁思

魂夢飛鵲語不成喜歲晚君不來紅妝為君洗

嗟我姑射山綽約飛仙子絳唇啓皓玉明眸漾寒水方  
平與麻姑相期永不死手披黃庭經金字寫青紙胡為  
謫人間離合亦悲喜天桃凝露珠東風任吹洗

庭下幽花冪寒霧金鴨冷煙無一縷從君別妾駕紅鸞  
望斷三山無覓處平時曲調休重舉長袖空隨不成舞  
醒眼穿愁送春去獨立殘陽與誰語

英英玉山禾乃是鳳皇食鳳皇殊未來禾生亦何益幽

香青春盡孤根含露寂委棄同蒿萊吐嗟人莫識

自君之往矣幽房守歲華眉頭勻翠淡裙帶縷金斜  
魄空成夢音書不到家憑誰度庾嶺和淚寄梅花

粉黛元知假丹青豈是真桃花初過雨溪水暗生春  
眼隨雲斷書書託雁頻漁郎自迷路枉殺武陵人

不作巫山雨螺川久住家欲知水未釋須信玉無瑕  
對局拈碁子開窗摘杏花誰能諳此意紅日又西斜

怨別

渡江君別妾恨不如桃葉桃葉解隨君渡江不用檝妾  
既不得隨渡江檝如飛自憐妾薄命江頭還獨歸一步  
一回首碧雲凝落暉空將盈掬淚和粉灑羅衣

黃庭堅

征南謠

傳聞交州初陸梁東連五溪西氏羌軍行不斷蠻標盾  
謀主皆收漢叛亡合浦譙門腥血沸晉興城下白骨荒  
謀臣異時坐致寇守臣今日愧芭桑已遣戈船下灘水



更分樓船浮豫章頗聞師出三鷄路盡是中屯六郡良  
漢南食麥如食玉湖南驅人如驅羊營平請穀三百萬  
祁連引兵九千里少府私錢不更知大農計歲今餘幾  
土兵番馬貔虎同蝮蛇毒草篁竹中未論芻粟捐金費  
直愁瘴癘連營空我思荊州李太守欲募蠻夷令自攻  
至今民歌尹殺我州郡擇人誠見功張喬祝良不難得  
誰借前箸開天聰詔書哀痛言語切為民一洗橫尸血  
摧鋒陷堅賞萬戶塹山堙谷窮三穴南平舊時頗臣順

欲獻封疆請旄節廟謀猶計病中原  
宣知一朝更屠滅  
天道從來不爭勝功臣好為可喜說  
交州難助安足貪  
漢開九郡勞臣監  
呂嘉不肯佩銀印  
徵側持戈敵百男  
君不見往年瀕海  
未郡縣趙佗閉關  
罷朝獻老翁竊帝  
聊自娛白頭抱孫  
思事漢孝文親遺  
勞苦書稽首請去  
黃屋車得一亡十  
終不忍太宗之仁  
千古無

竹枝歌

考試局與孫元忠博士竹間對窗夜聞元忠誦書

聲調悲壯戲作竹枝歌三章和之

南窗讀書聲吾伊北窗見月歌竹枝我家白髮問烏鵲  
他家紅妝占蛛絲

屋山啼鳥兒當歸玉釵眉蛛郎馬嘶去時燈火正月半  
階前雪消萱草齊

勃姑夫婦喜相喚街頭雪泥即漸乾已放游絲高百尺  
不應桃李尚春寒

歟乃歌并引

王稚川既得官都下有所盼未歸予戲作林夫人  
欸乃歌二章與之竹枝歌本出三巴其流在湖湘  
耳欸乃乃湖南歌也

花上盈盈人不歸  
棗下纂纂實已垂  
臘雪在時聽馬嘶  
長安城中花片飛

從師學道魚千里  
蓋世成功黍一炊  
日日倚門人不見  
看盡林鳥反哺兒

晁補之

補樂府三首

荳葉黃

蒹葭蒼荳葉黃南村不見岡北村十頃彊東家車滿箱  
西家未上場荳葉黃野離離鼠窟之兔入畦豕母從豚  
兒豕啼豚咿咿銜角復銜萁荳葉黃穀又熟翁媪衰鋪  
糜粥荳葉黃葉黃不獨荳白黍堪作酒瓠大棗紅皺荳  
葉黃穰穰何膻膻腰鎌獨健婦大男往何許官家教弓  
刀要汝殺賊去

漁家傲

漁家人言傲城市未曾到生理自江湖那知城市道晴  
日七八舩熙然在清川但見笑相屬不省歌何曲忽然  
四散歸遠處滄洲微或云後車載藏去無復在至老不  
曲躬羊裘行澤中

御街行

雙闕齊紫清馳道直如線煌煌塵內客相逢不相見上  
有高槐枝下有清漣漪朱欄夾兩邊貴者中道馳借問

煌煌子中道誰行此且復就下論  
驄馬知雜事官卑有  
常度那得行同路相效良獨難  
且復東西去

江頭秋風辭

雒陽客後車結駟傳燭食人生富貴不易得  
江頭秋風  
旦夕起胡為翩翩雒陽陌  
雒陽陌吹塵埃江頭樹安在  
哉秋風起菱花開鱸魚肥歸去來

晁冲之

樂府二首

病來飲不敵羣豪笑岸紗巾卸錦袍一坐空煩春筍手  
玉杯乳酪貯櫻桃

自摘茶蘼滿架空擬將豪氣敵春風欲知盞面玻璃闊  
看照紅顏在酒中



御選宋詩卷五